

弘

簡

錄

郎仁和邵經邦弘齋

皇清翰林院侍講學士四世孫遠平校閱

天王 唐一之一

高祖皇帝姓李氏諱淵字叔德隴西成紀人七世祖嵩當晉末據秦涼是爲涼武昭王六世祖歆生重耳魏弘農太守是生皇高祖熙任金門鎮將戍於武川因家焉皇曾祖天賜仕魏贈司空皇祖虎魏太尉賜姓大野氏與李弼等八人佐周代魏有功加柱國封唐國公卒諡曰襄皇考昝襲封任隋安州總管柱國大將軍卒諡曰仁以周天和元年生高祖於長安體有三乳及長倜儻豁達寬仁容衆襲封唐公母獨孤氏隋文帝后姊特見親愛復其姓李初補千牛備身累轉譙隴岐三州刺史榮易懷

頰二郡太守召爲殿內少監衛尉少卿煬帝征遼東命與楊玄
感兄弟督運懷遠鎮覺玄感將反逃歸以聞遽詔班師改弘化
留守兼知關右諸軍以禦玄感帝多猜忌臣下適以事召謁見
後期由此心懷疑懼大業十一年幸汾陽宮拜爲山西河東慰
撫大使承制黜陟討捕羣盜擊毋端兒於龍門柴保昌於絳州
破降其衆遷右驍衛將軍明年拜太原留守郎將王威高君雅
爲副擊高陽歷山飛賊甄翟兒於西河破之所娶神武肅公竇
毅女生四男建成世民玄霸元吉世民見隋室方亂陰有安天
下之志與晉陽令劉文靜宮監裴寂深相結納謀舉大事高祖
猶未知欲以情告懼不見聽寂謀邀飲令晉陽宮人私入以侍
最後告以大事祖大驚欲執送聞官寂謂與其事發併誅孰若
從之因令世民入白不得已將許未有以發會突厥數寇與馬

邑令王仁恭兵出無功法應執詣江都世民告事急矣已而赦
免亦寢當其時劉武周起馬邑林士弘起豫章劉元進起晉安
皆稱皇帝朱粲起南陽號楚帝李子通起海陵號楚王邵江海
據岐州號新平王薛舉起金城號西秦霸王郭子和起榆林號
永樂王竇建德起河間號長樂王王須拔起恒定號漫天王汪
華起新安杜伏威起淮南號吳王李密起鞏號魏公王德仁起
鄴號太公左材相起齊郡號博山公羅藝據幽州左難當據涇
馮盎據高羅皆號總管梁師都據朔方號大丞相孟海公據曹
州號錄事周文舉據淮陽號柳葉軍高開道據北平張長恐據
五原周洮據上洛楊士林據山南徐圓朗據兗州楊仲達據豫
州張善相據伊汝王要漢據汴州時德叡據尉氏李義滿據平
陵基公順據青萊淳于難據文登徐師順據任城蔣弘度據東

海王薄據齊郡蔣善合據鄆州田留安據章丘張青特據濟北
臧君相據海州殷恭邃據舒州周法明據永安苗海潮據永嘉
梅知巖據宣城鄧文進據廣州楊世略據循潮冉安昌據巴東
寧長真據鬱林而武周所據乃汾陽宮高祖晨集將吏告以吾
與若等留守此方而賊據離宮若縱不討罪當誅然欲待報江
都隔遠奈何威等咸曰國家之利可專者公也祖應曰諾乃下
令遠近募兵旬日間得衆萬餘威與君雅復疑有變謀因禱雨
圖之時已先覺陰爲備禦五月甲子令開陽府司馬劉政會告
二人謀反指以突厥大入爲其所名執而殺之六月己卯傳檄
諸郡悉起義兵自號爲大將軍開府置三軍及官屬以建成領
左軍世民領右軍元吉領中軍裴寂爲長史文靜爲司馬唐儉
溫大雅爲記室武士驍爲鎧曹政會與崔善爲張道源爲戶曹

姜暮爲司功皆參軍殷開山爲府掾長孫順德王長諧劉弘基
姜寶誼竇琮左右統軍開倉庫賑窮乏遠近響應攻拔西河斬
郡丞高德孺七月壬子仗白旗將衆於野有兵三萬拜元吉太
原留守遣文靜使突厥約兵來應癸丑發太原甲寅遣將張綸
下離石龍泉文城三郡獲鄧譯子元壽丙辰次靈石縣營於賈
胡堡丙寅隋鷹揚府司馬李軌起兵武威號大涼王八月辛巳
霍邑平引見吏民勞賞如西河益選丁壯從軍丙戌下臨汾郡
辛卯克絳郡癸巳次龍門突厥始畢可汗來助隋遣驍衛大將
軍屈突通守河東絕津梁汾陽薛大鼎請自龍門直濟河據永
豐倉傳檄三秦以定關中乃拜河東戶曹任環爲招慰大使招
降馮翊賊孫華土門賊白玄度具舟來逆九月戊午以少牢祀
河神乃濟師甲子次長春宮華陰令李孝常舉永豐倉來降令

建成文靜屯兵以守潼關三輔豪傑爭來赴義請王師入關值從弟神通自鄆起兵女柴紹妻李氏自司竹起兵皆來會因略定鄆杜王申次馮翊降太守蕭造乙亥建成自新豐趨霸上所過罷隋行宮苑籞出宮女還其家冬十月辛巳次長樂宮有衆二十萬遣使諭京尹衛文昇等遂以憂死命諸將圍城下令毋犯隋七廟及宗室違者罪三族丙申隋羅川令蕭銑起兵自稱梁王十一月丙辰克京城殺留守陰世師等餘皆不問命主符郎宋公弼收圖籍約法十二條殺人劫盜背軍叛者死悉除隋苛暴禁令癸亥遙尊煬帝爲太上皇立代王侑爲皇帝大赦改是年爲義寧元年甲子隋帝授高祖假黃鉞持節都督內外諸軍事大丞相錄尚書事進封唐王就武德殿爲丞相府視事於虔化門改教爲令十二月癸未贈唐襄公爲景王仁公爲元王

夫人竇氏爲唐國妃追諡曰穆立建爲唐國世子封元吉齊國公置丞相府長史司錄以下官命李綱掌選事竇威詳定禮儀領府庫以賜功勳河池太守蕭瑀以郡降甲辰趙郡公孝恭徇山南雲陽令詹俊徇巴蜀皆下之屈突通降義寧二年正月丁未詔唐王劔履上殿入朝不趨贊拜不名加前後羽葆鼓吹戊辰改建成左元帥世民右元帥略地東都二月己卯太常卿鄭元璿定樊鄱領軍司馬馬元規徇荆襄三月己酉元吉爲太原道行軍元帥丙辰字文化及弒煬帝於江都立秦王浩爲帝自稱大丞相吳興郡守沈法興據丹陽自稱江南道總管樂安人盧祖尚據光州自稱刺史戊辰唐王進位相國總百揆備九錫置本國丞相等官四月梁王銑稱帝五月乙巳加唐王冕十有二旒建天子旌旗出警入蹕戊午隋帝遜位令刑部尚書蕭

造司農少卿裴之隱奉皇帝璽紱甲子唐王卽皇帝位於太極殿命造兼太尉告於南郊大赦改是年爲武德元年賜爵給復有差推五運爲土德色尚黃改郡爲州太守爲刺史庚午隋東都留守元文都左武衛大將軍王世充立越王侗爲帝六月甲戌拜裴寂右僕射文靜爲納言竇威蕭瑀內史令廢隋大業律令頒新格五十三條置國子太學四門生三百餘員及州縣學生員已卯立四親廟追諡皇高祖宣簡公皇曾祖懿王皇祖景皇帝廟號太祖妣梁氏景烈皇后皇考元皇帝廟號世祖妣獨孤氏元貞皇后妃賢氏穆皇后庚辰立建成本爲皇太子封世民秦王元吉齊王宗室孝基以下八人皆爲郡王邊州各置總管統諸州兵癸未淮安王神通招慰山東乙酉廢隋帝爲酈國公選用故隋蔡王智積等子孫壬辰褒直言拜孫伏伽治書侍御

史賜帛三百匹癸巳禁言符瑞辛丑竇威薨以竇抗兼納言秋
七月庚申廢隋離宮八月戊寅約功臣恕死罪庚子贈隋太常
卿高頌郊國公賀若弼杞國公左翊衛將軍董純狄道公右驍
衛將軍李金才申國公左光祿大夫李敏觀國公皆柱國司隸
大夫薛道衡臨河縣公刑部尚書宇文弼平昌縣公皆開府諸
遭枉殺而子孫被流者皆還之九月癸丑置軍府改銀莧符爲
銅魚符辛未宇文化及弑秦王浩自稱皇帝冬十月壬申朔日
食癸巳詔行傳仁均戊寅曆辛丑大閏十一月薛仁果降堯君
素守河東執行軍總管趙慈景久之食盡君素被殺別將王行
本乘城拒守西突厥曷薩那可汗內屬獻寶珠帝卻之是歲太
白兩晝見竇建德立爲夏王高開道陷漁陽號燕王周洮張長
慈王德仁郭子和罕密郤江海皆來降李軌僭號涼州密復反

伏誅王須拔亡入突厥

武德二年春正月甲子竇抗罷陳叔遠兼納言吐谷渾伏允可汗乘亂收還故地遣使與連和使擊李軌伏允聽命仍來朝貢二月乙酉定租庸調法令文武官終喪丙戌州置宗師一人以統宗人無職任者甲午赦閏月淮安王神通擊宇文化及於魏縣走保聊城竇建德生擒之宇文士及封德彝鄭善果俱來降辛丑劉武周侵并州己酉徐世勣降賜姓李庚戌帝微行察風俗山賊張子惠等爲亂左屯將軍何潘仁戰於司竹驍騎將軍趙欽王娑羅戰於鰲屋俱死之丁卯秦叔寶程知節來降夏四月乙巳世充廢越王侗自稱皇帝五月庚辰安修仁執李軌降河右平癸未曲赦是月隋東海北海東平須昌淮南諸郡皆降六月戊戌立周公孔子廟四時國子敦祭庚子建德立隋齊王

陳子楊政道爲鄖公丁未劉武周將朱金剛寇并州以裴寂爲
晉州道行軍總管拒之秋七月壬申置十二軍分隸關內諸府
八月丁酉鄜國公薨追諡爲隋恭帝九月辛未殺戶部尚書劉
文靜籍其家李子通據江都稱皇帝沈法興據昆陵稱梁王丁
丑裴寂至介休兵潰爲金剛所敗右武衛大將軍姜寶誼死之
元吉懼奔還并州陷乙未地震梁師都引突厥寇延州鄜州刺
史梁禮死之冬十月乙巳楊恭仁爲納言乙卯祠華山是歲張
善相楊士林朱粲王薄將弘度徐師順李義滿蔡公順徐圓朗
羅士信杜伏威羅藝皆來降

三年春正月秦王討劉武周卻其軍蒲州降帝幸蒲津關王謁
於行在三月庚午改納言爲侍中內史令爲中書令以封德彝
兼之乙酉劉季貞降賜姓李夏四月甲寅秦王平并州世充陷

鄧州總管雷四郎死之五月詔晉州立老子廟以爲唐始祖壬午秦王屠夏縣六月丙申赦丙午封皇子元景趙王元昌魯王元亨鄧王諸孫承乾中山恪長沙祐宜陽泰宜都皆郡王己酉出宮女賜東征有功將士秋七月丙戌梁師都導突厥稽胡寇邊行軍總管段德操敗之九月鄭顯州總管田瓚以山南二十五郡來降冬十月幽州總管羅藝與高開道請降俱賜姓李是歲獨孤懷恩并瓜州刺史賀拔行威隰州總管劉師善俱反懷恩師善伏誅王行本時德劼楊仲達來降鄭許亳等十二州來歸李子通敗沈法興走赴江死子通徙都餘杭

四年春正月辛巳命皇太子統兵伐稽胡三月夏普樂令程名振降夏四月壬寅元吉及世充戰於東都敗績行軍總管盧君諤死之甲寅封皇子元方周王元禮鄭王元嘉宋王元則荆王

元茂越王夏五月壬戌秦王執寶建德河北平戊辰降王世充
河南平庚子營州人石世則執總管晉文衍叛附韃靼秋七月
丁卯大赦廢五銖錢行開元通寶斬建德赦世充甲戌劉黑闥
反徐圓朗僭稱魯王八月丙戌朔日食丁亥命皇太子安撫北
境九月遣夔州總管李孝恭及李靖伐梁冬十月乙巳蕭銑被
執十一月甲申郊十二月丁卯命世民元吉領兵以討黑闥是
歲車騎將軍董阿興太常少卿李仲文戴州刺史孟噉兒俱反
伏誅周法明蔣善合臧君相盧祖尚淳于難汪華李子通皆來
降子通復謀反伏誅

五年春正月乙酉黑闥據涪州自稱漢東王三月丁未秦王大
破之奔入突厥盡復所陷州縣夏四月庚戌凱還上迎勞於長
樂宮五月庚寅瓜州人王祿殺賀拔行威以降六月辛亥黑闥

引突厥頡利復寇山東詔車騎將軍元韶爲瓜州道李道玄爲河北道皆行軍總管以備之秋七月甲申作弘義宮丁酉隋漢陽太守馮盎以南越地來降嶺表悉定八月辛亥葬隋煬帝於揚州置陵廟以故時宮人守之九月黑闥再陷瀛與貝州刺史馬匡武許善護死之山東州縣復殺刺史長吏以應冬十一月丙申上如宜州簡閱將士黑闥入據涪州齊王元吉不敢進上遣皇太子將兵往討十二月壬申破之魏州甲戌至昌樂黑闥來拒魏徵勸太子悉解其將帥之囚慰諭遣之黑闥遂與數百騎遁去是歲殷恭邃楊世略劉元進王要漢冉安昌韓長真鄧文進田留安皆來降林士弘死其衆遂散

六年春正月己卯太子遣劉弘基追黑闥至饒陽其將諸葛德威執之以降斬於涪州山東平庚寅李世勣獲徐圓則盡入其

地二月平陽公主薨林邑爲隋所破及是復國遣使入貢三月
苗海潮梅知嚴左難當降夏四月巳未建故第爲通義宮奉義
監爲龍躍宮武功宅爲慶善宮祭元皇帝元貞皇后於舊寢王
申封皇子元璿蜀王元慶漢王元西拜裴寂蕭瑀左右僕射楊
恭仁兼中書令檢校涼州諸軍事冬十二月壬寅朔日食是歲
洪州總管張善安執孫州總管王戎襲黃州總管周法明沙州
別駕竇伏明殺總管賀若懷鄜渝州人張大智殺廣州都督劉
世讓右虞候杜士遠殺朔州高滿政與南越州刺史龐孝泰行
臺僕射輔公祏雋州人王摩娑俱反各命將討平之善安大智
仍降吐蕃陷芳州吐谷渾党項與奚寇河及幽州刺史盧士良
長史王說敗之

七年春正月諸州各置大中正一人無品秩以門望高者領之

已酉封高麗王高武爲遼東郡王百濟王扶餘璋帶方郡王新羅王金眞樂浪郡王二月諸州縣各置鄉學丁巳釋奠國學改大總管爲大都督府己未張金樹殺高開道三月戊戌李孝恭執輔公祏遂殺越州都督闕稜諸郡悉平夏四月庚子大赦頒新定官制以太尉司徒司空爲三公尚書門下中書秘書殿中內侍爲六省御史臺太常至太府爲九寺天策至左右領軍爲十四衛文散官開府儀同至將仕郎二十八階武散官驍騎至副尉二十一階上柱國至武騎尉十二等爲勳官五月丙戌作仁智宮六月辛丑幸之壬戌太子及慶州都督楊文幹反秋七月慶州人殺文幹以降雋州地震山崩越江水八月己巳吐谷渾寇鄯州驍騎將軍彭武傑死之丁酉遣裴寂往使突厥冬十月丁卯如慶善宮癸酉幸終南山謁老子祠十二月丁卯如龍

躍宮遂獵於鄠南高陵

八年春正月詔許突厥吐谷渾互市耕牛復參旗等十二軍以備突厥夏四月作太和宮六月甲子幸之秋九月令太府檢校諸州權量冬十月壬午如龍躍宮十一月庚子講武於同官辛丑徙封元壽吳王元慶陳王癸卯加秦王中書令齊王侍中

九年春正月詔祖孝孫定雅樂甲寅以裴寂爲司空齊王爲司徒壬午幸出胃昴丁亥見於卷舌二月初令州縣各祀社稷士民里閭相從立社各申祈報三月庚寅幸昆明池習水戰夏四月辛巳沙汰僧道廢浮屠老子法六月丁巳太白經天癸亥立秦王爲皇太子決軍國事赦天下罷汰僧道首名魏徵王珪以爲諫議大夫己卯太白晝見庚辰廬江郡王瑒發兵反幽州將王君廓殺之秋七月辛卯以高士廉爲侍中房玄齡宇文士及

中書令蕭瑀封德彝左僕射長孫無忌吏部杜如晦兵部皆尚書由辛亥至於八月丁巳太白連晝見癸亥禪位皇太子尊帝爲太上皇徙居弘義宮壽七十一乃崩諡曰神堯大聖大光孝皇帝廟號高祖

冊曰李唐勳興何名正統功熄隋紛義彰秦勇握乾三百土德作偏延休廿代真人繼踵裁衍弘詞折衷瑣冗

天王 唐一之二

太宗皇帝諱世民以隋開皇十八年十二月戊午生於武功之別館年四歲有異人謁見高祖命相之曰龍鳳之姿天日之表年幾弱冠必能濟世安民乃採其語名曰世民自幼聰睿玄鑒深遠臨機果斷不拘小節時人莫能測也年十六值煬帝爲突厥始畢圍於雁門應詔赴援隸將軍雲定興獻謀曰敵以倉卒

無援敢圍天子今吾軍宜先後行使數十里旌旗鉦鼓不絕敵
以爲大至可不戰走之若使知我虛實則勝敗未可知定興從
之軍至崞縣候騎望見果馳告可汗引去年十八從擊歷山飛
高祖陷圍中萬騎發薄馳輕騎往取而出還復奮擊大破之旣
壯豁達英武有大志能屈節下賢知隋必亡推財養士結納豪
傑婆長孫晟女其族弟順德與劉弘基避往遼東亡匿晉陽劉
文靜坐與李密姻繫獄夜往就見與圖大事時避亂入城者衆
文靜爲令久知其豪傑詐爲勅書以討高麗爲由發太原西河
雁門馬邑民年二十以上悉爲兵部署已定始啓告高祖建大
將軍府拜右領軍大都督封煥煌郡公以柴紹爲軍府長史將
至霍邑會天久雨糧盡衆謀欲還諫於高祖義師爲天下起宜
直入咸陽號令天下若還守一城是爲賊爾祖不納哭於軍門

名問其故對曰恐衆散於前敵乘於後死亡須臾所以悲爾祖
大寤曰起事者汝成敗亦惟汝適左軍已先返卽與隴西公分
追之引與俱還高祖復將而前遲明至霍邑隋虎牙郎將宋老
生屯兵以拒故閉不出從數騎舉鞭指麾若將圍城者老生怒
背城出戰祖率建成居陣東世民柴紹居陣南老生兵薄東陣
建成墜馬幾被獲世民自南原馳下坂斷其軍爲二超出陣後
奮擊老生敗走遂斬之留兵圍河東自引軍西徇渭北次於涇
陽勝兵九萬擊湖賊劉鷁子併其衆命殷開山劉弘基屯長安
故城而自趣司竹郡賊丘師利李仲文盤屋賊何潘仁向善思
宜君賊劉昊等皆來降頓於阿城獲兵十三萬長安父老賁牛
酒詣旌門不絕號令嚴肅秋毫無犯收納英俊以備僚列房玄
齡謁於軍門署爲記室遠近聞者咸自託焉尋會大軍入長安

屯於金城坊攻城西北克之義寧元年拜光祿大夫唐國內史
加封秦國公食邑萬戶薛舉攻扶風親擊敗之斬首萬級略地
至隴右二年徙封趙率兵十萬攻東都不克還設伏於三王陵
敗隋將段達兵萬人武德元年進尚書令右翊衛大將軍封秦
王薛舉寇涇州爲西討元帥進位雍州牧七月有疾劉文静竇
軌與賊敗績涇州守將劉威被執不屈死之八月疾間復屯高
塢城相持六十餘日辛巳舉死其子仁果稱帝數來挑戰按軍
不動十一月己酉遣行軍總管梁實柵淺水原以誘之其將宗
羅喉出擊遣龐玉往救幾敗王奮兵出其後羅喉敗走追至城
下將夕大軍繼至四面合圍仁果大懼詰朝請降俘精兵萬餘
隴右平諸將問曰始大王野戰破賊其主尚保堅城王無攻具
輕騎騰逐咸疑不克而竟下之何也對曰此在軍法以權道迫

之故敵不服爲計羅喉恃往年之勝意在輕吾今雖擊破擒殺尚寡若不急搆使還走投城便未可得且其衆皆隴西人一敗星披不及迴顧我軍隨而迫之所以懼而降也皆謝曰非所能及師還高祖遣李密馳傳勞之兩州時密初降入見之間不敢仰視退而歎曰真英主也獻捷太廟拜右武侯大將軍加太尉持節陝東道大行臺尚書令蒲陝河北諸總管兵皆受節度二年正月鎮長春宮轉左武侯涼州總管時劉武周據并州宋金剛陷滄州王行本據蒲州高祖懼諸將棄河東以守關中表諫不可願得兵三萬破賊於是悉發關中兵益之十一月出龍門關屯於栢壁諸將咸請戰益堅營壘以挫其鋒至三年四月金剛餒而走追至介州列陣南北七里以拒遣李世勣程醜金秦叔寶當其北翟長孫秦武通當其南而自率精騎衝其陣後

金剛大敗獲其將尉遲敬德并尋相等武周計屈奔於突厥守將楊伏念舉并州降詔蕭瑀卽軍中拜益州道行臺尚書令秋七月命總諸軍攻王世充師次穀州世充陣於慈澗以輕騎挑之值衆寡不敵陷於重圍左右咸懼敵驍將單雄信來逼交搶競進所從數百騎左右手射應弦皆倒獲其大將燕頤世充拔陣歸東都八月大軍進屯邛山遣史萬寶自宜陽南據龍門劉德威自太行東圍河內王君廓自洛口斷敵糧道黃君漢從河中下舟師襲迴洛城黃河已南響應九月將五百騎出觀戰地猝與敵遇合戰破之斬首三千餘級獲大將陳智略世充僅以身免僞筠州總管楊慶及滎汴洧豫九州相繼請降遣李世勣出轅轅道安撫其衆四年二月進屯青城宮挺身先進與屈突通表裏相應散而復合者屢敵衆退縱兵乘之俘斬八千餘列

營城下世充不敢出以求救建德嬰城待援益遣諸軍匝塹布
長圍以守之杜伏威遣將陳正通徐召宗率精兵二千來會僞
鄭州司馬沈悅以武牢降王君廓應之建德援兵已至酸棗諸
將言腹背受敵恐非萬全請退師穀州以爲後圖又請解圍就
險以俟其變王皆不許曰世充糧盡內外離心我當不勞攻擊
坐收其敝建德新破孟海公將驕卒情今吾據武牢扼其襟要
賊若冒險爭鋒破之必矣如其不戰旬日之間亦當自潰若不
速進使入武牢諸城新附必不能守二賊併力將若之何乃留
通輔齊王守圍親率步騎三千五百屯於武牢建德自滎陽西
營板渚相持二十餘日伺唐兵芻盡牧馬河北將襲武牢諜知
之詰旦牧馬河北以誘建德果陳兵汜水與世充將郭士衡陣
於其南綿亘數里諸將大懼王親將數騎昇高丘以望語諸將

口賊起山東未見大敵今度險而戰是無政令過城而陣有輕我心我按兵不出彼乃氣衰必將自退追而擊之無不克者伺午時後必破之已而建德列陣自辰至午士果饑倦皆坐列爭飲逡巡斂退令曰可擊矣身率輕騎追而誘之敵師迴陣未及整我衆先擊所向皆靡俄而衆軍合戰囂塵四起親揮史大奈程麟金泰叔竇宇文欽等舉幡直突出其陣後張我旗幟賊顧見大潰追奔三十里斬首三千餘級獲其衆五萬生擒建德於陣數曰我以干戈問罪得失存亡不預汝事何故越境犯我建德股慄而言今若不來恐勞遠取驅至東都世充大懼率其官屬二千餘人詣軍門降入據宮城令蕭瑀竇軌等封守府庫房玄齡收隋圖籍誅同惡段達等五十餘人枉被囚禁者悉釋之非罪誅戮者祭而誅之大饗將士班賜有差露布聞高祖大喜

手詔嘉獎遣裴寂迎勞軍中六月凱旋披黃金甲陳鐵騎甲士
俘二僞主及隋氏器物輦輅獻於太廟行飲至禮議古舊官不
稱殊功別表徽稱用旌勲德加號天策上將位王公上增食邑
二萬通前三萬戶賜袞冕金輅玉璧一雙黃金六十斤前後部
鼓吹及九部之樂班劍四十人將立爲太子王以海內漸平銳
意經籍開文學館以待四方之士選杜如晦等十八人爲學士
更疊入直降以溫顏與之討論經義或夜分而罷五年正月總
兵東討進軍肥鄉分遣絕其糧道相持兩月黑闥窘急求戰率
步騎南渡洛水晨壓官軍乃親率精騎破其馬軍乘勝復蹂步
卒賊衆大潰斬首萬餘級溺死無算迴師擊徐圓朗於是河濟
江淮諸邑皆平冬十月加左右十二衛大將軍皇太子忌其功
高與齊王協謀傾害曲事諸妃嬪使譽太子齊王而短秦王由

是高祖無易太子立秦王意七年秋突厥自原州入寇侵擾關中或說高祖遷都以敵利府庫玉帛子女若去長安則戎心止矣祖方命宇文士及踰南山按行樊鄧將徙都焉蕭瑀等心知其非不敢異王獨進諫曰邊寇自古爲患以霍去病漢延一將猶能志滅匈奴况臣忝備藩維使烽烟不息臣之責也幸乞聽臣一二年間若不繫頡利之頸徐議遷都亦未爲晚遂止九年突厥侵擾烏城建成舉元吉爲將密謀請與同送至昆明池將加屠害事露六月四日率無忌敬德玄齡如晦士及士廉君集知節叔寶志玄通與士貴等屯玄武門誅之更立爲皇太子斷決庶政務尚簡肅縱禁苑鷹犬停諸方進珍異天下大悅令百官上封陳安人理國之要已已令凡官號人名公私文籍非世民兩字連續者並不須諱辛未罷幽州督府廢大行臺各置大

都督府乙酉罷天策府八月甲子卽位於東宮顯德殿遣司空
裴寂告於南郊大赦放還武德以來流配者賜文武五品以上
勳爵免關內及蒲芮虞泰陝鼎租二歲天下給復一年民八十
以上賜粟帛百歲版授以官廢潼關以東瀕河諸關癸酉出宮
女三千餘人丙子立妃長孫氏爲皇后時突厥頡利自誇強盛
連寇涇州抵武功高陵京師戒嚴諸將多請與戰上不聽癸未
至便橋北上出玄武門幸渭水上與語責以負約蕭瑀以帝輕
敵叩馬而諫上曰朕思已熟非爾所知突厥以朕新有內難謂
不能師我若闔城彼且大掠故朕獨出示無所畏又陳盛兵使
知必戰旣深入吾地懼不能返故與戰則克和則固制賊之命
在此舉矣是日頡利果請和許之乙酉上幸便橋刑白馬與盟
詔殿中監豆盧寬將軍趙綽護送頡利引還瑀復請問計策上

曰突厥衆而不整惟利是視可汗在水西酋帥皆來謁朕若乘
醉縛之其勢易甚更使大軍蹕其後再敕無忌孝靖濟師幽州
以邀諸前破之必矣然朕新卽位要在安靜一與彼較殺傷必
多彼敗未及亡適足爲怨今什械卷鎧陷以玉帛其志必驕驕
則亡之端也故曰將欲取之必故與之瑀再拜曰非臣愚所逮
九月丁未日引諸衛騎兵統將等習射於顯德殿庭命曰自古
外彙中國互有盛衰朕今不使汝等穿池鑿苑唯習弓馬庶使
汝鬪前無橫敵親臨閱試賞以弓刀布帛罰亦隨之以後士卒
皆爲精銳壬子禁私家不得輒立妖神淫祀非禮祠禱其龜易
五兆之外諸雜占卜悉皆停斷冬十一月丙辰朔日食癸亥立
承乾爲皇太子進封恪漢王祜楚王癸酉加功臣裴寂實封一
千五百戶無忌敬德玄齡如晦君廓各一千三百戶順德柴紹

李藝孝恭一千二百戶君集公謹師立一千戶世勣弘基九百
戶士廉士及叔寶知節七百戶唐儉寶軌屈突通蕭瑀封德彝
劉義節六百戶錢九隴樊世興公孫武達李孟常段志玄龐卿
惲張亮李藥師杜淹元仲文四百戶張長遜張平高李安遠秦
行師馬三寶三百戶十一月庚寅降宗室郡王非有功者並爲
縣公十二月癸酉錄囚是歲新羅龜茲突厥高麗百濟党項並
遣使朝貢

貞觀元年春正月乙酉改元辛丑李藝反伏誅三月癸巳皇后
親蠶丙午詔內侍齊僕射崔季舒子剛黃門侍郎郭遵子雲右
丞封孝琰子君遵父旣極言蒙難子及淫刑各量才別敘問月
癸丑朔日食夏五月癸丑敕朝堂受訟辭有陳事者悉令上封
六月山東旱令所在賑恤免租秋七月壬子長孫無忌爲右僕

射八月關東隴右河南邊州霜害稼命溫彥博魏徵分往賑問
九月庚戌朔日食辛未杜淹爲吏部尚書參議朝政冬十月丁
酉關中饑減膳十二月戊申利州都督李孝常右武衛將軍劉
德裕謀反伏誅

二年春正月辛亥以杜如晦檢校侍中總監東宮兵馬癸丑吐
谷渾寇岷州都督李道彥敗之丁巳徙封恪蜀王泰越王祐燕
王復置六侍郎副六尚書事并置左右司郎中各一授趙王元
景雍州牧恪益州秦揚州皆大都督庚午以李靖爲中書令二
月丙戌鞞鞞內屬三月戊申朔日食關內旱蝗議決死罪壬戌
命李靖爲關內道行軍大總管以備薛延陀巳巳遣杜淹巡諸
州出御府金寶贖還饑民鬻子者庚午責躬大赦癸酉雨夏四
月巳卯瘞隋暴骸丙申契丹內屬壬寅朔方人梁洛仁殺梁師

都以降五月大雨雹六月庚寅子治生賜是日生子者粟辛卯
追論化及黨與削辰州刺史裴虔通爵流驩州萊州刺史牛方
裕絳州刺史薛世良廣州長史唐泰義虎牙郎將高元禮皆除
名徙邊子孫勿齒秋八月甲戌朔親省冤獄辛丑立二王後建
廟置國宮時軍國無事上日視膳於西宮公卿奏秋霖卑隰上
言氣疾請營一閣以居不許九月丙午詔内外文武羣臣年高
致仕及抗表去職者朝祭之日悉列本品見任之上丁未出宮
女壬子大有年賜酺三日冬十月戊子殺瀛州刺史盧祖尚十
一月辛酉郊十二月壬辰加王珪侍中

三年春正月丙午朔旱避正殿奉太上弘義宮爲太安宮戊午
享太廟癸亥耕籍田辛未裴寂罷二月戊寅立齡如晦並爲左
右僕射李靖兵部尚書魏徵祕書監參預朝政夏四月甲午始

御太極殿戊戌賜孝義粟家五斛產子者一斛八十九以上各有差百歲加絹二匹六月戊寅旱慮囚已卯大風拔木壬午遣大臣禱於名山大川及往關內諸州慰撫文武各言得失秋八月己巳朔日食是歲李靖統六總管師十餘萬破突厥頡利突利及郁射設皆來奔薛延陀西突厥高昌皆來朝貢戶部奏塞外中國人歸及四裔前後內附爲州縣者百二十餘萬人

四年春正月丁卯朔日食二月己亥幸溫湯甲辰李靖敗突厥於陰山獲隋皇后蕭氏及煬帝孫正道送京師甲寅大赦賜酺五日擢溫彥博中書令轉吏部尚書戴胄參預朝政丁巳旱詔公卿言事三月庚辰大同道行軍副總管張寶相生擒突厥頡利可汗獻俘太廟夏四月戊戌西北諸蕃君長請尊上爲天可汗六月乙卯治洛陽宮秋七月甲子朔日食癸酉蕭瑀罷上常

與論隋文帝房玄齡以爲勵精之主勤勞政事每一坐朝或至日晏五品已上引之論事宿衛之人傳殮而食上曰公得其一未知其二文帝性察而心不明心暗則照有不通性察則多疑於物自以欺孤寡得之謂羣下不可信任故事皆自決雖勞神苦形未能盡合於理朝臣測知上意何人再敢直言朕意不然以天下之廣豈可一人獨斷方選天下之才爲天下之務委任責成各盡其用庶幾可望治理因令有司詔敕有不便卽時執奏不得順旨施行甲戌太上皇不豫廢朝辛卯疾愈八月甲寅李靖爲右僕射九月己卯如隴州赦今歲租賦降成陽始平武功死罪以下冬十一月壬戌轉侯君集兵部尚書參議朝政戊寅除鞭背刑是歲天下斷死刑二十九人東至於海南至嶺表皆外戶不閉行旅不齎糧焉

五年春正月癸酉大蒐於昆明池番樊君長咸從丙子獻禽大安宮癸未朝集使請封禪二月己酉封皇弟元裕郤王元名譙王靈夔魏王元祥許王元曉密王庚戌封子愔梁王貞漢王惲鄒王洽晉王慎申王囂江王簡代王秋八月戊申殺大理丞張蘊古旣而悔之冬十一月丙子郊十二月丁亥詔京師決死刑五覆奏諸州三覆奏其日尚食毋進酒肉壬寅幸溫湯獵於囷山賜新豐高年帛有差癸丑赦關內

六年春正月乙卯朔日食癸酉靜州山獠反右武衛將軍李子和敗之三月戊辰如九成宮丁丑降雍岐豳三州死罪以下賜民八十以上粟帛夏五月魏徵檢校侍中秋七月己巳詔天下行鄉飲酒禮九月己酉幸慶善宮冬十二月辛未慮囚縱死罪者歸其家是歲諸羗內屬者三十萬人

七年春正月戊子上製破陣樂舞圖辛丑賜京城酺三日三月
戊子王珪罷庚寅魏徵爲侍中癸巳李淳風獻所鑄渾天黃道
儀秋八月辛未東西洞獫狁寇邊命張士貴爲龔州道行軍總管
以討之山東河南大水遣使賑恤九月縱囚來歸悉赦之冬十
月乙丑京師地震十一月丁丑頒新定五經壬辰長孫無忌爲
司空十二月辛丑芙蓉園獵於少陵原以少牢祭如晦杜淹李綱
之墓

八年春正月辛丑張士貴及獫狁敗之壬寅遣大臣李靖蕭瑀
楊仁恭王珪韋挺皇甫無逸李襲譽張亮李大亮竇誕杜正倫
劉德威趙弘智分行四方觀省風俗二月乙巳皇太子加元服
賜五品以上子爲父後者爵一級民酺三日降死罪以下夏五
月辛未朔日食吐谷渾寇涼州命段志玄樊興爲西海赤水道

行軍總管以伐之秋七月隴右山崩大蛇屢見山東河南淮南大水遣使賑恤八月甲子帝出虛危歷於氏至十一月上旬乃滅九月丁丑皇太子朝冬十月作永安宮段志玄破吐谷渾迫奔八百餘里十一月己丑吐谷渾寇源州執鴻臚丞趙德楷十二月辛丑命李靖爲行軍大總管與侯君集李道宗李道彥李大亮高甌生六總管兵以伐之壬子越王泰爲雍州牧丁卯從太上皇閱武城西還置酒未央宮羣臣咸侍太上令頡利起舞馮智戴賦詩笑曰胡越一家古所未有帝奉觴上壽羣臣皆呼萬歲太上大悅是歲龜茲吐番高昌女國石國皆遣使朝貢九年春正月党項叛三月庚辰洮州羗殺刺史孔長秀附於吐谷渾壬午大赦救天下戶立爲九等乙酉高甌生敗羗人閏四月丙寅朔日食癸巳靖及諸總管破吐谷渾於牛心堆五月乙

未又破之於烏海副總管薛萬均萬徹破之於赤水源獲名王
二十餘人庚子太上皇崩帝罷朝皇太子聽政壬子李靖平吐
谷渾於西海之上獲其王慕容伏允封子慕容順光爲西平郡
王其下弑之遣侯君集就立其子諾曷鉢爲河源郡王安集部
衆冬十月庚寅葬獻陵以謀臣武將宗戚陪葬戊申祔主太廟
增爲六室

十年春正月甲午聽政壬午立齡魏徵上梁陳齊周隋五史癸
丑徙封元景荆王元昌漢王元禮徐王元嘉韓王元則彭王元
懿鄭王元軌霍王元鳳虢王元慶道王元裕鄧王元名舒王元
祥江王靈夔燕王恪吳王泰魏王祐齊王憺蜀王愔蔣王貞乲
王慎紀王仍各出爲諸州都督夏六月壬申溫彥博爲右僕射
楊師道爲侍中魏徵特進知門下省事己卯長孫皇后崩十一

月庚寅葬昭陵十二月慕容曷鉢來朝庚辰慮囚是歲山東河南民疾疫命醫療之

十一年春正月癸巳加魏王泰雍州牧庚子頒新律令作飛山宮甲寅玄齡等進所修五禮詔所司行用二月丁巳預營九峻山陵務戒厚葬惟木馬塗蠶及賜功臣密戚并德業佐時者塋地各一區祕器同之甲子如洛陽宮祭漢文帝乙丑給民百歲以上侍養五人降徒以下囚并免一歲租調三月丙戌朔日食辛亥大蒐廣成澤夏四月詔舉孝悌淳篤兼閑時務儒術該通可爲師範文辭秀美堪以著述明識政體可委治民志行脩立鄉閭推重凡五等皆乘傳來詣六月丁巳幸明德宮己未定制諸王并功臣世襲刺史秋七月癸未大雨水穀洛溢乙未詔百官言事壬寅廢明德宮之玄圃院賜遭水家丙午給奉享亳州

老子廟兗州孔子廟戶各二十復涼武昭王近墓戶二十以守衛九月丁亥河溢壞陝州河北州縣毀河陽中渚賜瀕河遭水家粟帛冬十二月辛酉百濟王遣太子隆來朝

十二年春正月乙未叢松二州地震二月癸亥如陝州幸河北縣以祀夏禹及觀底柱勒銘以紀功德甲子巫州獠反夔州都督齊善行敗之丁卯觀鹽池庚午如蒲州甲戌如長春宮免朝邑今歲租賦降囚罪戊寅贈堯君素蒲州刺史錄其子孫閏月庚辰朔日食秋七月癸酉高士廉等上氏族志命爲右僕射八月壬寅吐蕃寇松州闕水道行軍總管牛進達敗之冬十月己卯獵於始平賜高年粟帛乙亥百濟遣使貢金甲雕斧

十三年春正月乙巳謁獻陵曲赦三原大辟以下罪及今歲租賦賜宿衛郎將并令丞各爵一級二月庚子停世封刺史三月

乙丑字出畢昴夏四月戊寅如九成宮甲申阿史那結社率反
伏誅壬寅雲陽石然自去冬不雨至於五月甲寅避正殿詔五
品以上言事減膳罷役理囚賑乏乃雨秋八月辛未朔日食冬
十一月辛亥楊師道爲中書令劉洎黃門侍郎參知政事十二
月壬申侯君集爲交河道行軍大總管以伐高昌乙亥封弟元
嬰滕王子福趙王是歲高麗新羅西突厥吐火羅康國安國波
斯疎勒于闐焉耆高昌林邑昆明皆遣使朝貢

十四年春正月庚子命有司讀時令甲寅幸魏王泰第二月丁
丑釋奠國學賜師生帛壬午幸溫湯乙未詔以梁皇伯褚仲都
周熊安生沈重陳沈文阿周弘正張機隋何妥劉焯劉炫皆前
代名儒今學徒多行其義凡有子孫皆錄用之夏五月壬寅徙
封靈巽魯王六月滁濠二州野蠶繭大如奈其色綠凡收八千

三百碩秋八月癸酉侯君集克高昌以其地爲安西都護府曲赦大辟以下罪冬十一月甲子朔郊十二月丁酉獻高昌俘賜酺三日癸卯高麗世子相權來朝

十五年春正月辛巳如洛陽宮次溫湯衛士崔卿刁文懿謀反伏誅三月戊辰幸新作襄城宮四月辛卯詔以來歲二月有事於泰山所司詳定儀制乙未免洛州租夏五月壬申并州故老喪請臨幸宴於武成殿因問卽日百姓何如奏曰四海太平黎民歡樂皆陛下政教所致帝悅賜物有差六月己酉幸出太微垣犯耶位詔停封禪避殿減膳秋七月甲戌星滅冬十月辛卯大閱於伊闕壬辰幸嵩陽宮十一月癸酉薛延陀寇邊命李世勣朔州道李大亮靈州道李襲譽涼州道皆行軍總管以伐之十二月甲辰戰於碯真水敗延陀乙巳贈戰亡將士官

十六年春正月乙丑遣使安撫安西就募往戍者徙天下死罪囚以實之辛未拜岑文本中書侍郎夏六月戊戌太白晝見詔復建成太子諡爲隱元吉巢王諡刺秋七月戊午拜長孫無忌司徒房玄齡司空魏徵太子太師冬十一月丙辰獵於武功壬戌獵岐山賜所過高年袍衾粟帛遂幸慶善宮宴故人父老於南門論舊事遞相起舞上壽是歲高麗蓋蘇文弑其君高武立兄子藏爲王

十七年春正月戊辰魏徵薨代州都督劉蘭謀反伏誅二月戊申圖功臣於凌煙閣三月丙辰齊王祐反命李世勣討之丁巳熒惑守心前星十九日而退甲子旱遣使覆囚決獄乙丑賜祐死給復齊州一年夏四月乙酉皇太子有罪廢爲庶人同謀漢王元昌侯君集等皆伏誅丙戌立晉王治爲皇太子大赦賜酺

三日文武五品以上加爵一級民八十以上粟帛丁亥楊師道罷己丑無忌立齡蕭瑀並爲太子太師太傅太保李勣太子詹事同中書門下三品庚寅上謁太廟以謝承乾之過癸巳降封魏王泰東萊郡王五月乙丑詔舉孝廉并茂才異能之士六月己卯朔日食壬辰改葬隋恭帝甲午旱避殿減膳詔京官五品以上言事丁酉授高士廉開府儀同三司同中書門下三品閏月丁巳詔皇太子典左右屯營兵秋七月丁酉房玄齡母憂起復八月庚戌刑部尚書張亮參預朝政九月癸未徙承乾於黔州冬十一月己卯郊壬午賜酺三日十二月庚申幸溫湯十八年春正月乙未如鍾官城庚子如鄠二月己酉如零口丁巳給復突厥高昌部人隸諸州者夏四月辛亥如九成宮秋七月甲午營州都督張儉率幽營兵及契丹奚以伐高麗八月壬

子安西都護郭孝恪爲西川道行軍總管以伐焉者丁卯拜劉
洎侍中岑文本中書令馬周守中書令九月褚遂良參預朝政
辛卯郭孝恪及焉者戰滅之執其王突騎施以獻冬十月辛丑
朔日食癸卯宴雍州父老於上林苑賜粟帛甲寅如洛陽宮十
一月戊寅慮囚庚辰遣使巡問鄭汝淮澤四州高年宴賜之甲
午伐高麗命張亮平壤道李勣馬周遼東道皆爲行軍大總管
凡十六總管兵皆隸焉十二月壬寅庶人承乾卒

十九年春二月庚戌上親征統六軍發洛陽乙卯留皇太子定
州監國命高士廉劉洎馬周張行成高季輔同掌機務以輔之
丁巳賜所過高年餼粟帛自爲文祭比干墓贈太師諡忠烈
三月壬辰次幽州城南上親誓師命無忌攝侍中楊師道攝中
書令以隨大饗六軍遣行丁未岑文本薨於軍癸亥李世勣克

蓋牟城夏五月己巳平壤道總管程名振克沙卑城庚午車駕
次遼澤瘞隋人戰亡者乙亥遼東道總管張君又有罪伏誅丁
丑軍至馬首山甲申克遼東城六月丁酉克白巖城己未大敗
高麗於安市城東南山左武衛將軍王君愕死之因名所幸山
爲駐蹕山刻石紀功辛酉賜酺三日秋七月壬申以太牢祭死
事官加爵四級葬之子襲任九月癸未班師冬十月丙午次營
州丙辰皇太子迎謁於臨渝關戊午次漢武臺刻石紀功十一
月癸酉大饗軍於幽州庚辰次易州癸未平壤道總管張文幹
有罪伏誅丙戌次定州十二月戊申次并州己未薛延陀寇夏
州左領軍大將軍執失思力敗之庚申殺劉洎

二十年春正月辛未夏州都督喬師望及薛延陀戰敗之丁丑
遣大理卿孫伏伽黃門侍郎褚遂良等二十二人巡行天下及

嶺南以六條黜陟庚辰曲赦并州宴從官及起義元從賜粟帛
給復有差二月甲午賜從伐高麗無功者勳一轉三月己巳還
宮庚午不豫皇太子聽政己丑張亮反伏誅閏月癸巳朔日食
夏六月乙亥遣兵部尚書崔敦禮及李世勣伐薛延陀敗之秋
七月辛亥疾愈八月甲子封皇孫忠爲陳王己巳幸靈州庚辰
次涇陽鐵勒十一部族各遣使朝貢且乞歸命置漠官詔遣會
獵州時北荒悉平相繼至者不可記咸請上爲可汗九月甲辰
詔勅石以序其事辛亥靈州地震冬十一月己丑詔凡祭祀兵
馬宿衛行魚契給驛授五品以上官及除決死罪皆以聞餘悉
委皇太子

二十一年春正月丁酉仍詔來歲二月封泰山甲寅以鐵勒諸
部爲州縣購還中國人陷沒者賜京師酺降死罪以下二月丁

丑皇太子釋菜於太學詔以左丘明二十一人從祀廟庭三月
戊子復伐高麗命左武衛大將軍牛進達青丘道李世勣遼東
道皆行軍大總管諸總管兵咸隸焉夏四月乙丑作翠微宮五
月戊子臨幸庚戌李世勣克南蘇木底城秋七月乙未進達克
石城丙申作玉華宮八月詔以泉州海溢河北大水復停封禪
九月丁酉封子明爲曹王冬十二月戊寅契苾何力爲崑丘道
行軍大總管率三總管兵以伐龜茲是歲墮娑登乙利鼻林送
都播羊同石波斯康國吐火羅阿悉吉等遠襲十九國並遣使
朝貢詔於突厥北至迴紇置驛六十六所以通北荒焉
二十二年春正月己亥長孫無忌檢校中書令知尚書門下三
省事崔仁師爲中書侍郎參知機務尋除名配連州丙午薛萬
徹爲青丘道行軍大總管二月起復褚遂良爲中書令乙亥幸

玉華宮己卯獵於華原三月丁亥赦宜君縣民自玉華宮遷者
給復三年夏四月丙子葛微敗高麗於泊灼城秋七月甲申太
白晝見壬辰殺華州刺史李君羨八月己酉朔日食辛未執失
思力伐薛延陀餘部於金山九月庚辰崑丘道行軍總管阿史
那社爾降處月處蜜破龜茲六撥等五十城執其王訶利布失
畢以歸冬旱是歲新羅女王金普德死立其妹真德爲王

二十三年春三月以來日赤無光己未雨辛酉大赦丁卯上不
豫命皇太子聽政夏四月己亥幸翠微宮皇太子從五月戊午
帝謀貶李世勣疊州都督己巳帝崩壽五十三秘不發喪遣舊
將統飛騎勁兵從皇太子先還發六府甲士分列於道及安化
門翼從乃入庚午奉車駕輿馬從官侍御如常還京師壬申發
喪殯於太極殿遺詔太子卽位柩前諡曰文武大聖皇帝廟號

太宗

冊曰湯武聖功優入性學成康致治彝倫攸作猗帝英資
偶與之合濟世安民一言以足好大貪功牽於頻復萬世
至公主張斯錄

弘簡錄卷之一終

弘簡錄卷之二

明刑部員外郎仁和邵經邦弘齋學

皇清翰林院侍講學士四世孫遠平校閱

天王 唐一之三

高宗皇帝諱治字爲善太宗第九子母長孫皇后生於東宮之麗正殿初封晉王遙授并州都督自幼岐嶷端審寬仁孝友著作郎蕭德言授以孝經上問書中何言卽舉始於事親中於事君終於立身進思盡忠退思補過將順其美匡救其惡數語以對上大悅曰行此足以事父兄爲臣子矣九歲母后崩哀慕感動上屢加慰撫及令遊觀習射辭以非所好願得常奉至尊居膝下自是特深寵異尋拜右武侯大將軍十七年上與無忌玄齡李勣等議立爲皇太子營別院於寢殿側使居之每視朝常

令在傍觀決庶政有所叅議數稱其善伐高麗命留監國駕發
有期悲啼累日許飛驒逝表起居并奏事軍旋時上患癰親爲
吮之還京以六月甲戌朔卽皇帝位年二十二命太子少師于
志寧爲侍中少詹事張行成兼侍中右庶子高季輔兼中書令
左庶子許敬宗兼禮部尚書大赦天下恩喪皆如故卽名李勣
爲特進洛州刺史留守洛陽宮癸未進無忌太尉知三省如故
賜物三千段癸巳轉勣開府儀同三司同三品秋七月丙午避
上諱改民部爲戶部治書侍御史爲中丞治中爲司馬別駕爲
長史治禮郎爲奉禮郎八月癸酉朔河東地震晉州尤甚壞廬
舍壓死五千餘人三日又震遣使存問給復二年賜死者人絹
三四丙子上太宗諡號開寶加李勣左僕射庚寅葬昭陵九月
甲寅加荆王元景司徒吳王恪司空丙寅祔主太廟以房玄齡

高士廉屈突通配食冬無雪十一月乙丑晉州地又震于閭來
朝左翊衛郎將高侃伐突厥

永徽元年春正月辛丑朔改元不受朝壬寅御太極殿受朝不
會丙午立妃王氏爲皇后丁未進陳王忠雍州牧二月辛卯封
皇子孝許王上金杞王素節雍王夏五月己未太白晝見詔羣
臣事有不便於民者悉令上封目引朝集使數人入閣問以百
姓愁苦時無忌與遂良同心輔政上恭已以聽天下皆稱有貞
觀之風洛陽人李弘泰誣告無忌謀反立命斬之吐火羅獻大
鳥如鵝食銅鐵遣獻昭陵吐蕃贊普死遣使弔祭秋七月丙寅
旱親錄囚徒九月癸卯高侃執車鼻可汗詣闕獻於社廟及昭
陵冬十一月己未遂良被劾左授同州刺史十二月阿史那賀
魯叛自稱可汗琰州獠寇邊梓州都督謝萬歲死之是歲晉州

地震者再雍絳同等九州旱蝗齊定等十六州水 二年春正
月戊戌下詔賑貸諸州各遣郎中一人存問務盡哀矜之旨乙
巳加宇文節銀青光祿大夫柳爽中書侍郎俱同中書門下三
品夏五月壬辰京官五品以上文武職事並給隨身魚袋秋七
月丁未賀魯陷金嶺城蒲類縣處月朱邪孤注殺招慰使單道
惠叛附賀魯遣大將軍梁建方契苾何力爲弓月道總管往討
之八月乙丑大食國始遣使朝獻已巳拜于志寧左僕射張行
成右僕射並同中書門下三品高季輔爲侍中九月癸巳改九
成宮爲萬年宮廢玉華宮爲佛寺以同州苦泉收地賜貧民閭
月辛未頒新定律令格式於天下冬十一月辛丑郊甲申雨水
水十二月乙未太白晝見冬無雪晉州定襄地皆震 三年春
正月癸亥自去秋不雨至於是月上避殿不受朝暹降天下死

罪并流一等徒以下宥之建方何力大破朱耶孤注於牛山斬
首九千級俘獲不計丙寅旱無忌請遜位不許己巳起褚遂良
爲吏部尚書門下三品丙子祠太廟丁亥籍千畝賜羣官帛三
月辛巳進宇文節侍中柳爽中書令甲申幸觀德殿羣臣大射
夏四月庚寅韓瑗守黃門侍郎來濟守中書侍郎並門下三品
五月庚辰詔錄周司沐大夫裴融齊黃門侍郎裴澤隋饒同三
司豆盧毓御史中丞游楚客挺節忠鯁子孫並加甄擢秋七月
丁巳立陳王忠爲皇太子大赦乙丑于志寧張行成高季輔各
兼太子少師少傅少保宇文節兼太子詹事避太子名改中允
爲內允中書舍人爲內史舍人中郎將爲旅賁郎上見天下大
稔問戶部尚書高履行去年進戶口數奏總一十五萬又問隋
時幾何曰八百七十萬卽今幾何曰三百八十萬勅自今二年

一定戶是歲吐谷渾新羅高麗百濟并駿馬諸國並遣使朝貢
弘化長公主自吐谷渾來朝 四年春正月癸丑朔濮王泰薨
不受朝賀丙子駙馬房遣愛薛萬徹柴令武謀反伏誅辭連荆
王元景吳王恪巴陵高陽公主並賜死配流執失思力州州守
文節李道宗桂州廢蜀王愔爲庶人已亥加授徐王元禮司徒
李勣司空三月壬子朔頒孔穎達五經正義於天下明經進士
據以考試丙辰御觀德殿陳逆人房遺愛等口馬資財引王公
諸親蕃客及文武九品以上射而取之夏四月戊子林邑遣使
貢馴象壬寅旱避殿減膳親錄繫囚遣使分省天下冤獄文武
官極言得失六月己丑太白晝見八月己亥隕石十八於馮翊
有聲如雷九月甲戌褚遂良爲右僕射冬十月庚子幸溫湯甲
辰曲赦新豐戊申睦州女子陳碩貴反自稱文佳皇帝攻陷州

縣婆州刺史崔義立揚州長史房仁裕共討平之十一月癸丑
崔敦禮爲侍中柳爽中書令十二月詔頒新律疏於天下五
年春三月立才人武氏爲昭儀戊午幸萬年宮曲赦夏四月韓
瑗來濟並加銀青光祿大夫柳爽兼吏部尚書長孫無忌子三
人皆授朝列大夫閏月丁丑夜大雨水暴漲宮衛武士皆散走
死者三千餘人麟遊縣漂居人無算自此至六月恒州溺五千
餘家蒲州汾陰河北岐陽皆大水各遣使慮囚免課役供頓秋
七月辛巳萬年宮舊宅有小鳥如雀生大鳥如鳩八月辛未吐
蕃獻馬九月丁酉還宮冬十一月癸酉命工部尚書開立德和
雇京兆人四萬一千築長安外郭九門各起觀凡三十日而罷
冬十二月癸酉倭國獻琥珀瑪瑙戊午謁昭陵在路皇子賢生
六年春正月壬申朔朝於陵所側建佛寺祀陪葬以少牢赦賚

有差庚寅封皇子弘爲代王賢爲潞王二月乙巳皇太子加元服施恩三月程元振等復伐高麗破之於貴端水壬戌武氏著內訓一篇進位宸妃夏五月癸未程知節等五將軍出蔥山道以討賀魯薛瑗進位侍中來濟中書令貶柳奭遂州刺史超拜李義府中書侍郎秋七月乙亥崔敦禮爲中書令八月始置員外同正官以尚藥奉御蔣孝璋爲之己酉增大理少卿一員置京師常平倉九月庚午貶褚遂良潭州都督乙酉洛州大水毀天津橋冬十月齊州黃河溢己酉廢皇后王氏爲庶人十一月丁卯朔臨軒命武氏爲皇后大赦十一月己巳皇后見太廟癸酉追贈后父士護司空母楊氏代國夫人十二月遣禮部尚書許敬宗每日待詔於武德殿西門是歲嘉州辛道讓妻涪州高苑縣吳文威妻魏氏皆一產四男

顯慶元年春正月辛未廢皇太子忠爲梁王立代王弘爲皇太子壬申大赦改元賜文武勳民酺如故事甲子于志寧兼太子太傅韓瑗來濟許敬宗並爲太子賓客賓客之始此二月庚寅加破陣樂名神功辛亥加贈士驍司徒周國公三月辛巳皇后祀先蠶於北郊丙戌杜正倫守黃門侍郎同三品夏四月戊申御製并書慈恩寺碑文成僧玄奘等迎導以天竺法儀帝后御安福門觀之五月己卯無忌進梁陳周齊隋五代史志三十卷許敬宗進所撰東觀新書二百卷御製序文賜之六月以高祖配昊天於圜丘太宗配五帝於明堂秋七月潞王賢領雍州牧崔敦禮太子少師同三品八月改戶部爲度支程知節與賀魯部歌邏祿及處月等戰於榆幕谷大破之九月庚辰括州海溢癸未初置驃騎大將軍官從一品知節與賀魯男陁運戰斬首數千

級進至恒篤城俘獲無算冬十一月乙丑皇子顯生加宗官朝
集使勳級十二月乙酉置算學二年春正月庚寅幸洛陽宮
蘇定方爲伊麗道行軍總管帥四將兵以討賀魯二月庚午封
顯周王徙素節郁王三月李義府爲中書令兼御史大夫貶侍
御史王義方萊州司戶杜正倫兼度支尚書夏五月丙申幸明
德宮從宰相請隔日視事秋七月丁亥還洛陽八月丁卯敬宗
義府誣奏韓瑗來濟遂良潛謀不軌貶振台愛三州刺史辛未
以敬宗爲侍中九月庚寅杜正倫爲中書令冬十月戊戌講武
許鄭之郊曲赦遣使祭鄭子產陳太丘墓十二月丁卯改洛陽
爲東都官員階品並准雍州廢穀州以福昌河陽濟源汜水溫
等縣并懷鄆二州併隸洛州遙授周王顯洛州牧己巳劉祥道
爲黃門侍郎知選事置起居舍人兩員品同起居郎分左右散

騎常侍各兩員隸中書省是歲廢
祀合方丘神州爲一

祭 三年春正月戊子頒行無忌等顯慶新禮二月丁巳車駕
還京壬午慮囚蘇定方攻破賀魯及陞延闕吸賀魯走石國副
將蕭嗣業追擒之西域平分突厥地置濠池崑陵二都督府立
典昔亡繼往絕二可汗以統押之夏五月徙安西都護府於龜
茲六月壬子程元振敗高麗於赤烽鎮秋九月廢書算律學冬
十一月乙酉正倫義府有隙各貶普橫二州刺史中書侍郎李
友益除名罷出州以許敬宗爲中書令大理卿辛茂將爲侍中
四年春二月乙亥親試進士擢郭待封張九齡五人上第待詔
弘文館隨仗供奉三月契苾何力往遼東經略夏四月己未于
志寧罷乙丑許圜師爲黃門侍郎參預政事戊戌削無忌封爵
許州安置五月丙申兵部尚書任雅相度支尚書盧承慶並同

三品參政事秋七月壬子復進李義府爲吏部尚書同三品詔御史追柳爽韓瑗赴京師許敬宗謀遣袁公瑜往鞠問併無忌三人殺之冬十月乙巳皇太子加元服大赦賜酺閏十月戊戌幸東都皇太子監國十一月許圜師檢校侍中癸亥賀魯餘黨都曼寇邊詔蘇定方爲神丘道總管劉伯英崑夷道總管以伐之五年春正月癸卯定方俘都曼以獻甲子幸并州皇后從二月丙戌宴從官及諸親官屬父老各賜帛有差曲赦管內諸州令有司察義旗初身亡墓在者加佐命功臣食別封者子孫二階大將軍府僚佐存者一階賜民酺三日年八十以上版授刺史縣令甲午祠舊宅以武士護殿開山劉政會配食三月丙午皇后宴親族并皇室親鄰故舊於明堂命婦人入會內殿各賜帛及加從行文武五品以上長史司馬勳級婦女八十已上

版授郡君已酉講武城西上御飛閣引羣臣臨觀辛亥命蘇定
方伐百濟丁巳改左右領軍爲左右千牛夏四月戊寅車駕還
東都造八關宮五月壬戌臨幸改名合璧宮戊辰定襄都督阿
史德樞賓爲沙磧道行軍總管以伐契丹六月庚午朔日食辛
卯詔文武五品已上四科舉人秋七月乙巳廢梁王忠爲庶人
徙黔州戊辰盧承慶以罪免八月庚辰定方等平百濟而縛其
王扶餘義慈并太子隆等五十八人獻於則天門分其地置熊
津等五都督府大酺三日冬十月上令皇后決百司奏事十二
月壬午阿史德樞賓敗奚契丹

龍朔元年春二月乙未益綿等州龍見改元曲赦壬戌幸合璧
宮詔從皇后請禁天下婦人爲俳優之戲夏五月丙申伐高麗
命契苾何力出遼東道蘇定方出平壤道任雅相出淇江道皆

爲行軍大總管統蕭嗣業程名振龐孝恭及諸蕃兵凡三十五
軍水陸並進甲子晦日蝕六月庚寅許敬宗等進累壁六百三
十卷秋八月丙戌令諸州舉孝行及累葉義居可勵風俗者九
月甲辰帝與后幸河南縣百三歲大女張家及天宮寺高祖潛
龍時舊
宅度僧二十人又幸李勣并許圜師第壬子徙封賢沛王領揚
州都督左武侯大將軍顯領并州都督設宴沛王宅勅三省并
諸親官屬詣之奏九部樂賜帛綵各有差冬十月癸酉命鄭仁
恭仙萼道阿史那忠長岑道皆行軍大總管以伐鐵勒 二年
春正月丙午置東都國子監增學生二月甲子改在京諸司及
百官名尚書省爲中臺門下省爲東臺中書省爲西臺左右僕
射爲左右匡政左右丞爲肅機侍中爲左相中書令爲右相自
餘各從義訓又改六宮內職名甲戌任雅相卒於軍戊寅龐孝

恭戰死命定方等班師夏四月庚申朔車駕自東都還京居新建蓬萊宮五月丙申許圜師爲左相六月乙丑令道士女冠僧尼等拜其父母秋七月熊津都督劉仁願等大破百濟餘黨拔其數城戊戌李義府喪免八月壬寅許敬宗爲太子少師同三品九月戊寅起復義府爲司列太常伯同三品冬十月丁酉幸溫湯皇太子監國庚戌上官儀同三品十一月辛未下圜師獄貶爲虔州刺史十二月辛丑都督府各加大字更沛王揚州周王并州皆大都督是歲颶海道行軍總管蘇海政矯殺崑陵都督阿史那彌射西突厥寇庭州刺史來濟死之三年春正月鄭仁恭等帥師討鐵勒餘種盡平之乙丑李義府爲右相二月癸巳置太子左右諭德桂坊等官改司經局爲桂坊館罷崇賢館隸左春坊庚戌詔日引在京繫囚二十人親自臨問有不盡

者令皇太子錄之復置書算律三學以書學隸蘭臺算學隸秘閣律學隸詳刑寺改燕然府爲瀚海都護府瀚海府爲雲中都護府夏四月乙丑義府有罪下獄除名編配嵩州丙午蓬萊宮新起舍元殿減京官俸并雍岐等十五州口營之五月壬午命劉伯英統嶺南兵伐柳州叛蠻六月吐蕃與吐谷渾相攻詔鄭仁恭等分屯涼鄯以爲禦備秋八月癸卯書出左攝提詔百寮極言得失命竇德立劉祥道等九人持節分行天下仍令內外五品以上各舉所知九月戊午熊津道行軍總管孫仁師敗百濟於白江冬十月辛巳詔皇太子五日一至光順門監諸司奏裁決小事丙申絳州介山麟見丙午麟趾見舍元殿前十二月庚子改元

麟德元年春正月赦甲子改雲中都護爲單于大都護府戊子

幸萬年宮時皇后專權黜陟生殺決於其口上惟拱手而已中外奏章咸稱二聖夏五月乙卯置姚州都督府丙寅旱避正殿秋七月丁未詔以三年正月封禪八月己卯幸舊宅降萬年縣繫囚因幸大慈恩寺戊子劉祥道兼右相竇德玄左相九月己卯詔周京兆尹廣陵郡公宇文孝伯忠亮貞堅加授其孫左威衛長史思純朝散大夫冬無雪十二月丙戌殺西臺侍郎上官儀庶人忠坐與交通賜死劉祥道罷以太子右中護樂彥瑋西臺侍郎孫處約同知政事二年春正月壬午如東都丁酉幸合璧宮戊子慮囚甲子有事東封停選以竇德玄爲封禪使三月甲寅司戎太常伯姜恪同三品辛未東都乾元殿成閏月癸酉日蝕疎勒及弓月吐蕃攻于闐命西州都督崔智辨將軍曹繼叔救之夏四月丙午曲赦桂廣黔三都督府大辟已上罪丙

真講武邙山之陽戊辰孫處約樂彥瑋罷政卿陸敦信左相許
敬宗右相李勣少師五月辛卯頒行李淳風所造曆賜名麟德
六月鄆州大水壞城邑冬十月壬戌帶方刺史劉仁軌爲大司
憲兼知政事癸亥高麗王遣子福男來朝丁卯車駕發東都華
戎衛從數百里不絕是歲大稔米斗五錢麴麥不列市十一月
丙子次於原武以少牢祭紀信墓贈驃騎大將軍過壽張幸張
公藝宅十二月丙午御齊州大廳宿於泰山顛次

乾封元年春正月戊辰朔祀昊天上帝於封祀壇以高祖太宗
配饗已巳昇山封藏玉牒庚午禪於社首祭皇地祇以太穆文
德配饗帝初獻皇后亞獻越國太妃燕氏終獻壬申大赦改元
御朝覲殿受朝賀諸文武及華戎岳牧并致仕官三品已上賜
爵四等四品至七品加二階八品以下一階老人百歲已上版

授下州刺史婦女郡君九十八十節級齊州給復一年半兗州
二年經歷之處免今年和賜酺七日癸酉宴羣臣陳九部樂賜
物有差丙子皇太子弘設會丁丑於兗州界建紫雲仙鶴萬歲
三觀封巒非煙重輪三寺天下諸州各建觀寺一所丙戌駕還
甲午次曲阜縣幸孔子廟祀以少牢追贈太師增修祠宇免褒
聖侯德倫子孫賦役二月己未次亳州幸老君廟追號太上玄
元皇帝剏造祠堂置令丞各一員改谷陽縣爲真源縣給復宗
姓一年夏四月甲辰還京庚寅改鑄乾封泉寶錢六月壬寅高
麗泉男生內附詔契苾何力等率五總管兵應之秋七月庚午
陸敦信罷以劉仁軌兼右相冬無雨雪十月己酉命李勣率六
總管兵以伐高麗 二年春正月耕籍田旱避殿減膳錄囚徒
罷乾封錢復行開元通寶錢二月辛丑復萬年宮舊名九成宮

夏六月乙卯西臺侍郎楊弘武太子左中護戴至德東臺侍郎
李安期司烈少常伯趙仁本並同東西臺三品舍人張文瓘參
知政事秋八月己卯朔日蝕丙辰李安期罷九月庚申上創藥
皇太子監國辛未李勣等拔高麗十七城

總章元年春正月庚寅劉審禮爲西域安撫大使壬子劉仁軌
爲遼東副大總管兼安撫大使二月戊午敗高麗克扶餘南蘇
木底蒼巖等城斬首五千餘級獲生口三萬餘器械牛馬無算
丙寅起明堂以歷代制度不同漢魏以還彌更訛舛詔合古今
增損制度更新之大赦改元二月戊寅幸九成宮己卯置乾封
明堂二縣癸未皇太子釋奠國學贈顏回太子少師曾參太子
少保夏四月丙辰盡出五車上避殿減膳詔內外上封羣臣咸
言此非國計不足上勞聖慮許敬宗舉以爲高麗滅亡之徵帝

曰朕爲萬國之主高麗百姓卽朕百姓豈可推過於彼乙亥
彗滅秋九月癸巳李勤命薛仁貴爲前鋒大破高麗進至鴨綠柵
圍平壤城擒其王高藏及大臣男建等以歸獻俘廟社分其地
爲安東都護府置四十二州高麗平冬十月烏菴國婆羅門盧
迦逸多自言能合不死藥以爲懷化大將軍十二月丁卯郊甲
戌姜恪爲相聞立本守右相是歲京師山東江淮旱饑二年
春正月封諸王嫡子皆爲郡王二月辛酉以李敬玄爲西臺侍
郎張文瓘東臺侍郎與郝處俊並同三品盧承慶司刑太常伯
三月癸酉皇后親蠶夏四月乙酉幸九成宮五月庚子移高麗
戶於江淮山南京西諸州空閑處安置秋八月戊申朔日蝕括
州海溢冀州大水並遣使賑給秋七月劔南旱遣司珍大夫路
勣行存問賑貸秋八月甲戌改瀚海爲安北都護府九月乙巳

幸岐州大蒐曲赦管內賜高年衣物粟帛其高祖故時胥徒存者隨材擢用冬無雪是歲裴行儉爲司列少常伯始定銓注法遂爲永制衆議明堂制度未決會歲饑不果立

咸亨元年春正月辛卯裂遼東地爲州縣二月戊申旱親錄囚徒祈禱名山大川癸丑日色如赭丁巳東南有聲如雷三月甲戌朔大赦改元二月丁丑改蓬萊宮爲含元宮夏四月吐蕃寇白州連陷州縣十八又合于闐衆襲龜茲撥換城罷安西四鎮丁亥以薛仁貴爲邏婆道行軍大總管阿史那道真郭待封爲副領兵五萬擊之庚午幸九成宮五月雍州大雨雹丙戌詔諸州縣營孔子廟并學館六月壬寅朔日食秋七月戊子薛仁貴等至大非川爲吐蕃論欽陵所襲並坐除名吐谷渾全國盡沒唯慕容諾曷鉢及其親信數千帳內屬徙於靈州界八月丙寅

旱避殿減膳冬十月癸酉大雪給死耄耋帛任收養年幼不能存活者十二月庚寅復諸司及百官舊名是歲大饑關中尤甚禁釀酒詔轉江南粟以賑給之二年春正月乙巳幸東都皇太子監國二月辛未遣使存問諸州夏四月戊子大風折木雨雹六月丁亥慮囚秋九月地震冬十月搜揚明達禮樂之士十一月甲午朔日食庚戌幸許汝等州教習武肄癸酉獵許州葉縣昆水之陽十二月姜恪爲侍中閤立本中書令三年春正月辛丑姚州蠻叛發梁益等十八州兵遣右衛副率梁積壽往討之夏四月戊寅幸合璧宮壬午於洛水南校旗上問宰相伊尹負鼎俎於湯緣是得政不知鑄鼎所復在何國立本處俊以古義對五月乙未改賜五品以上新魚袋並飾以銀三品以上各賜金裝刀子礪石一具六月丙子置洛州柏崖倉九月乙

卯魏與冀州皆復舊名戴至德兼戶部尚書張文瓘檢校大理卿郝處俊中書侍郎李敬玄吏部侍郎十一月戊子朔日蝕十二月癸卯劉仁軌復同三品高侃大敗新羅之衆於橫水四年春二月壬午皇太子納妃曲赦賜酺夏四月丙子幸九成宮戊寅太子新宮落成設宴召五品已上并諸親極歡而罷辛巳婺州暴雨漂居民詔令賑給秋八月辛丑上疴疾令太子受諸司啓事已酉大風毀太廟鴟吻冬十一月丙寅製上元樂章并舞有一德二儀三才四時五行六律七政八風九宮十洲慶雲之曲改元肆赦遇圓丘方澤諸大祠享卽用之餘祭則停十二月丙午弓月疎勒二國王入朝請降

上元元年春二月壬午劉仁軌爲雞林道大總管以討新羅李謹行及衛尉卿李弼副之三月辛亥朔日食已巳祀先蠶夏四

月辛卯武承嗣爲宗正卿封周國公五月己未詔春秋二社外
小民不得輒聚六月壬寅太白入東井秋八月壬辰追尊宜簡
公爲宣皇帝懿王爲光皇帝高祖爲神堯皇帝太宗爲文武聖
皇帝后爲太穆神皇后文德聖皇后皇帝稱天王皇后稱天后
戊戌定文武官服色三品已上衣紫金玉帶四品深緋五品淺
緋並金帶六品深綠七品淺綠並銀帶八品深青九品淺青鎗
石帶庶人服黃銅帶九月辛亥各具新服賜宴麟德殿癸丑追
復長孫無忌官爵以曾孫翼襲封趙國公許歸葬昭陵先塋十
一月丙午朔幸東都已酉狩華山之曲武原十二月戊子于闐
王伏閣雄波斯王卑路斯皆來朝壬寅天后請王公百寮皆習
老子每歲準孝經論語例試於有司二年春正月壬戌支汗
郡王獻碧玻瓈丙寅置昆沙都督府分于闐境內爲十州以伏

閻雄有學吐蕃功立爲都督辛未吐蕃遣大臣論吐渾彌謂和不許二月劉仁軌大破新羅於七重城斬獲甚衆其王金法敏伏罪遣使朝獻方物詔赦之復其官爵三月丁未日色如赭丁巳親蠶帝風疹不能聽朝政事皆決於天后夏四月分括州永嘉永固二縣置溫州析臨海縣爲樂安永寧二縣辛巳天后殺周王顯妃趙氏巳亥殺皇太子弘追諡爲孝敬皇帝六月戊寅立雍王賢爲皇太子大赦秋七月辛亥削杞王上金封邑澧州安置八月庚子劉仁軌爲左僕射戴至德右僕射張文瓘爲侍中郝處俊中書令並兼太子賓客李敬玄吏部尚書兼太子左庶子同三品許圜師戶部尚書冬十月庚辰雍州雨雹析永州營道江華唐興三縣置道州壬午字出角亢之南長五尺十二月丁亥龜茲王白素稽獻名馬并銀叵羅

儀鳳元年春二月甲戌移安東都護府於遼東乙亥堅昆獻名
馬丁亥幸溫湯三月癸卯黃門侍郎來恒中書侍郎薛元超並
同三品三月己巳朔吐蕃入寇鄯廓河芳等四州命左監門衛
中郎將令狐智通伐之乙酉討吐蕃授周王顯洮州道行軍元
帥總劉審禮等十二總管相王輪涼州道行軍元帥總契苾何
力等軍皆遙領不行戊午敕尚書省今後制勅並用黃紙爲卷
軸以備披檢夏四月甲寅中書侍郎李義琰同三品戊午幸九
成宮六月癸丑黃門侍郎高智周同三品秋七月慧起東井指
北河漸東北長三丈掃中台指文昌宮五十八日方滅庚子避
殿減膳放繫囚令文武官上言得失壬寅置南選簡補廣交黔
等州官吏遣使賜恤青齊等州海溢漂溺之處九月以狄仁傑
爲侍御史丙申削郇王素節戶三分之二袁州安置癸丑北京

置金鄴州冬十月祫享太廟十一月壬申陳州言鳳凰見改元
大赦庚寅李敬玄爲中書令十二月丙申皇太子賢上所注後
漢書賜物三萬段戊午遣宰相來恒河南道薛元超河北道左
丞崔知悌等江南道各巡撫二年春正月乙亥耕籍田庚辰
京師地震壬辰幸司竹園二月丁巳封高藏遼東都督朝鮮郡
王扶餘隆熊津都督帶方郡王各遣歸安輯餘衆移安東都護
府於新城以統之夏四月左庶子張大安同三品河南北旱遣
使賑給八月徙封賴英王改名哲十二月乙卯吐蕃寇扶州勅
關內河東諸州召募勇敢以討之詔在京三品已上各舉文武
中才能堪任將帥牧守者三年春少雨去冬無雪上以爲憂
夏四月丁亥朔百官四齋朝天後於光順門戊申大赦改來年
爲通乾癸丑涇州人生子連心異體五月壬戌幸九成宮以相

王輪領洛州牧秋七月丁巳宴近臣諸親於咸亨殿上謂霍王
元軌自避暑此宮甘雨頻降夏麥豐熟秋稼滋榮又得敬立表
張虔弼與吐蕃戰一日兩陣斬馘極多太史又奏本月朔太陽
合虧不虧此皆上天垂祐宗社降靈豈虛薄所能致皇子輪最
小特所留愛比納劉延景女極有孝行復是私衷一喜思與叔
等同爲此歡因效柏梁體賦七言詩侍臣並和九月丁巳還京
丙寅敬立審禮等復戰青海之上王師敗績審禮被俘上深患
之問計中書舍人郭正一等咸以不深討爲上策冬十一月乙
未昏霧四塞丙申雨木冰十二月以反語不善停通乾號

調露元年春正月己酉幸東都免司農卿韋玄機出米以濟饑
民二月壬戌吐蕃贊普卒文成公主遣大臣來告哀且請和親
不許遣使弔祭會葬夏四月戊午左丞崔知悌爲戶部尚書郝

處俊爲侍中五月壬午盜殺正諫大夫明崇儼丙戌皇太子賢
監國戊戌造紫桂宮於沔池之西六月辛亥大赦改元秋七月
己卯朔詔以今年冬至有事嵩丘禮官學士詳定儀注八月丁
巳命郝處俊高智周崔知溫劉景先等兼修國史九月壬午裴
行儉討西突厥擒十姓可汗阿史那都支及別帥李遮旬以歸
擢爲禮部尚書冬十月單于大都護突厥阿史德溫傅及奉職
二部反立阿史那泥熟匄爲可汗二十四州首領並叛遣都護
長史蕭嗣業將軍花大智李景嘉等往討敗績嗣業配流桂州
壬子發兵令將軍曹懷舜守恒州并涇崔獻守絳州龍門以爲
禦備庚申停封嵩山十一月甲辰裴行儉爲定襄道大總管與
營州都督周道務等兵十八萬并西軍程務挺東軍李文博等
總三十萬以討突厥甲寅臨軒試應岳牧舉人

永隆元年春正月乙酉宴諸王并諸司三品以上諸州都督刺史於樂城南門樓奏新造六合還淳之舞二月丙午詔故符璽郎李延壽所撰正典辭殫雅正賜其家絹五十疋壬子霍王元軌率文武百僚請出俸料以助軍費癸丑幸溫湯丁巳至少室山戊午謁少姨廟贈故玉清觀道士王遠知大中大夫諡曰昇真先生又幸隱士田遊巖所居己未幸嵩陽觀及啓母廟並令立碑又幸逍遙谷道士潘師正所居甲子還東都三月裴行儉大破突厥於黑山擒其首領奉職僞可汗泥熟匄爲其部下所殺傳首來降夏四月乙丑幸紫桂宮戊辰黃門侍郎裴炎崔知溫中書侍郎王德真並同三品五月丁酉太白經天秋七月吐蕃寇河源屯良非川李敬玄敗績貶爲衡州刺史黑齒常之復力戰大破之擢爲河源軍經略大使是月突厥餘衆圍雲州程

務挺擊敗之八月甲子廢皇太子賢爲庶人幽於別所乙丑立英王哲爲皇太子改元大赦賜酺三日謫左庶子張大安普州刺史降封曹王明零陵郡王黔州安置九月河南北諸州大水遣使賑卹溺死者給槥賜物冬十月己酉還京十一月朔日食洛州饑減價官糴以救饑人

開耀元年春正月宴百官及命婦於麟德殿乙亥突厥溫傳部落寇原慶等州命裴行儉及將軍李知十王杲等分兵討之己亥免雍岐華同及河南北遭水處民戶地稅詔雍州長史李義玄朕思還淳返樸示天下以質素比聞游手墮業造異色綾錦靡費旣廣時稍不豐便致饑饉兼商賈富人厚葬越禮可嚴加捉搦勿使更然二月丙午皇太子行釋奠禮三月辛卯劉仁軌郝處俊並兼太子少傅少師罷知政事五月丙戌定襄總管曹

懷舜與突厥史伏念戰敗績滅死配流嶺南七月太平公主出
降薛紹赦京城繫囚閏月丁未裴炎爲侍中推知溫薛元超並
中書令徵處士田游巖爲太子洗馬庚申上服餌令皇太子監
國丙寅雍州大風害稼米價騰踊是月突厥平裴行儉程務挺
執阿史那伏念溫傳振旅凱旋俄伏誅八月丁卯朔河南北大
水許江淮就食辛卯改交州爲安南都護府九月丙申彗出天
市長五尺冬十月丙寅朔日食乙丑改元曲赦定襄及諸道從
征官吏十一月癸卯徙庶人賢於巴州

永淳元年春正月乙未朔關內旱日色如赭罷朝令會關內諸
府兵於鄧綏等州就穀二月癸未皇孫滿月大赦改元大酺三
日戊午賜名重照立爲皇太孫夏四月甲子朔日食丙寅幸東
都皇太子留守時穀貴減扈從兵士庶從者多殍踣於路辛未

十姓突厥阿史那車薄寇邊命安西副都護王方翼討平之丁亥上以黃門侍郎郭待舉兵部侍郎岑長倩中書侍郎郭正一吏部侍郎魏玄同歷任並淺未可卽與宰相同稱定爲同中書門下承受進止平章事自是外司四品已下知政事者以平章爲名五月丙午澍雨連日洛水溢壞天津等橋立德弘教景行諸坊併溺居民溺損麥苗自六月後京兆岐隴旱蝗疫癘死者枕藉寇盜縱橫貧人相食天后屢勸上封中岳因此輒止秋七月己亥於嵩山置嵩陽縣造奉天宮藍田造萬全宮山東大水民饑吐蕃寇柘松翼等州冬十月甲子京師地震丙寅黃門侍郎劉景先同平章事十二月南天竺于闐各獻方物阿史那骨篤祿等招合殘衆據黑沙城入寇并州薛仁貴大破之

弘道元年春正月甲午朔幸奉天宮遣使祭嵩岳少室等山西

王母啓母巢父許由等祠二月庚午突厥寇定州刺史霍王元軌敗之三月庚寅骨篤祿并阿史德元珍等圍單于都護府司馬張行師死之丙午雪見五車北二十五日而滅夏四月己巳遷東都甲申綏州部白鐵余據城平縣反命程務挺爲單于道安撫大使并討骨篤祿元珍等五月庚寅突厥寇蔚州殺刺史李思儉敗豐州都督崔智辨遂寇嵐州秋七月己丑封皇孫重福唐昌郡王留守京城后復欲上中岳行禮冬十一月召皇太子至東都令監國佐以裴炎劉齊賢郭正一等值上苦頭重不可忍侍醫秦鳴鶴欲微刺出血可愈后言人主首豈刺血處此可斬上謂血出未必不佳卽刺百會穴眼暫明后於帷中拜謝以爲天賜身負錙銖賞之丁未疾甚宰臣已下並不得見十二月己酉改元上欲親御則天門樓宣赦氣逆不能上馬遂於殿

前宣之禮畢更問侍臣民庶喜否對以百姓蒙赦無不感悅上
曰蒼生雖喜我命危篤天地神祇若延吾一兩月之命得還長
安死亦無恨是夕帝崩於貞觀殿年五十六遺詔七日而殯皇
太子卽位柩前園陵制度務從節儉軍國大事有不決者取天
后處分羣臣上尊諡曰天皇帝廟號高宗

冊曰範欽則竊基淺斯坼履霜冰至禍匪旦夕烝報之愆
允宜世殛殃及宗昆凶家害國